



Tge din dus giuvenns babs tar il congedi?

Dovri in congedi da paternitad da duas emnas u betg? Dus babs èn da different'opiniun.

2



Il «Pink Ribbon Walk» en Engiadina Bassa

6000 dunnas survegnan onn per onn il cancer dal sain. Per far attent èn dunnas chaminadas.

7

südostschweiz

LA QUOTIDIANA

FMR Fundaziun Medias Rumantschas, Via da Masans 2, 7000 Cuirra, 081 544 89 10, redacziun@fmr.ch

ENGIADINA

Giubileum illa Villa Milla

(fmr/fa) Avant desch ons ha la società Chüra d'uffants Engiadina Bassa drivi a Scuol la canorta nomnada Villa Milla. Daspö quella jada es la canorta adüna bain occupada. In gövgia passada ha salvà la società sia radunanza generala. Davo ch'el vaiva presidià nouv ons la Chüra d'uffants regiunala, ha *Fadri Mosca* demischionà. Sco successuras sun gnüdas elettas las co-presidentas *Margaritta Braumüller-Carl e Jo-*

siana Daguati. Sper la canorta spordscha la società eir la pussibilità da laschar chürar l'uffant dad uschedittas mammas dal di o in gruppas plü grondas da famiglias dal di. A la radunanza esa gnü rendü attent cha la società tschercha ulteriuras mammas dal di. Sco cha Mosca ha agiunt, manca in Villa Milla planet il lö per tuot ils uffants.

> PAGINA 7

SURSELVA



La casa dils golfists ei ussa era en possess dil club. FOTO AUGUSTIN BEELI

Ina investiziun da 4,8 milliuns

(fmr/abc) Il Club da golf Bona Vista Sagogn ha giu frequentas sco aunc mai. Suenter che las autoritads han dau liber ils 11 da matg las activitads sportivas ein ils golfists arrivai en roschas. La radunanza generala extraordinaria da venderdisera ei medemamein stada frequentada fetg bein. La cumpra d'ina immobiglia ella valeta da bien tschun milliuns francs ha

levantau gl'interess direct dil commembers dil club. 60 investurs novs dattan emprests da totalmein 2,155 milliuns francs e 14 vegls garanteschon 1,345 milliuns francs per cumprar la casa dil club. Ina ulteriura cundiziun per la midada da maun ha pretendiu la solidaritad da tuts commembers activs.

> PAGINA 3

GRISCHUN CENTRAL

Malgro igl virus bungs affars

(fmr/gns) Chels deis on Lai Penticularas SA e Savognin Penticularas SA preschento lour cefras digl davos onn da gestiun. Tiers tgi la staschung d'anviern è cuzzo en meis pi pac on igls dus travagls betg pers schi bler a stgamgiamaint.

Anfignen igl mez da mars ins geva an direcziun d'ena staschung da record cun esser stadas las relaziuns da neiv e

dall'ora ple tgi angla bunas. Lai Penticularas SA è fatg igl davos onn da gestiun en stgamgiamaint da passa 26 milliuns francs e tar Savognin Penticularas SA monta chel ensatge daple tgi otg milliuns francs. Chesta stad ins è già a Lai ed er a Savognin tants giasts scu darar.

> PAGINA 8

Dapli che «do-re-mi»

Identitad e realitad musicala en il Grischun rumantsch



In da blers chors (virils) en Rumantschia: Chor viril Lumnezia anno 1978.

FOTO NOSSAISTORGIA.CH/ARCHIV CULTURAL LUMENZIA

DA MARTIN CABALZAR/FMR

■ **Musica è dapli che tuns e surs, ritmus e dinamica. Musica è era ina part da nossa identitad.** Gist en il Grischun rumantsch èn chant e musica da vegl enna colliads stretgamain cun l'identitad

culturala. Dentant er nossas chanzuns popularas che paran d'esser originalas e singularas èn vegnidas influenzadas d'ordaiser e han promovì il barat cultural. La lingua è e resta dentant la caratteristica la pli singulara da nossa cultura cantica. La globalisaziun e digitalisazi-

un vegnan dentant er a revoluziunar la musica rumantscha e metter ella en in context pli vast. La FMR ha assistì al Café scientific da l'Institut per la perscrutaziun da la cultura grischuna.

> PAGINA 2

Uorsin sco reclama

■ (fmr/afi) Avant 75 ons es cumparü il prüm cudesch cun l'istorgia dad Uorsin, scritta da Selina Chönz ed illustrà dad Alois Carigiet. A chaschun da l'exposiziun «Alois e Selina – 75 ans



Uorsin» illa Chesa Planta a Samedan

s'haja preschantà d'incuort il prüm film dad Uorsin. Preschaint d'eira eir *Gianni Cantoni*, il protagonist principal i'l film realisà da Condor Films da l'on 1964. «Eu vaiva quella jada set ons», s'alorda'l. Sco ch'el manzuna ha la crew dal film adüna guardà bain dad el, pustüt il vegl Riz à Porta da Silvaplana d'eira per el sco ün bap.

> PAGINA 7

«I fa 'zac', e nus essan puspè en questa spirala.»

Fa dapli luxus propi ventiraivel? Bettina Cadotsch davart la maxima «pli pauc è dapli» – Pagina 12

Abstract ni concret?



FOTO AUGUSTIN BEELI

(fmr/abc) Ella Cularta a Laax exponan dapi sonda ils dus artists *Urs Cavelti* e *Walter Derungs*, omisdu oriunds da Sagogn e sesents a Basilea. Igl ei in'ovra integrala: La gronda installaziun «Monument» che tonscha sur omisduas alzadas dalla casa e las fotografias exponidas secumpleteschan. L'exposiziun ha il tetel «Concret».



10037

Servetsch d'abunents e da distribuziun: tel. 0844 226 226 mail: abo@somedia.ch